

sier Nicolò, podestà. Dil venir li uno trombete, et voleno quel castello a nome dil re di romani. Et si fazi provisione; et di questo scrive a li provedadori a Treviso. E il re dovea esser a Seravale et venir poi li; si che si proveda presto.

Di Zazil, di sier Alexandro Contarini, podestà et capitano. Esser venuto uno trombete; et non à zente ni artilarie, quelli cittadini dubitano di aver il vasto per esser minazati.

Di Monfalcon, di sier Antonio Loredam, podestà. Di uno trombete venuto a dimandar il loco; à scritto a Udene, provedi.

Di Cao d'Istria, dil provedador di l'armada. Di quelle occorrentie. Quelli Frangipanni et Marco Can danizano molto etc. Et scrisse di quelle occorrentie et richiesse alcune cosse.

Fu posto, per i savij, che sier Zuan Paulo Gradenigo, luoco tenente in la Patria di Friul, ensa di Udene e vadi in campo con le zente, et sia *de presentì* electo, per scurtinio, uno vice loco tenente a Udene, per do mexi, con ducati 60 neti al mexe; et fu presa. Et fato il scurtinio, rimase sier Antonio Zustignan, dotor, fo savio da terra ferma, *quondam* sier Pollo, qual tolse respeto ad acceptar a la matina sequente, et poi la matina refudoe.

Di Elemagna. Se intese ozi, e in questi zorni, come le terre franche haveano intimato al re di romani dovesse andar a incoronarsi, *aliter* elezeriano uno altro re, qual si dice sarà el ducha di Saxonia, e si incoronerà imperador; et che li electori di l'imperio è di questa opinion. Et con ditto re non è alcun homo da conto di Alemagna, *excepto* el marchexe di Brandiburg. *Item*, le terre franche hanno fato liga con sguizari a conservation di statì l'horo.

Fo disputato certa materia secretissima et sacramentà el consejo, la qual poi se intenderà; *unum est*, fo dito è stà preso contra la voluntà dil principe, et che sier Andrea Trivixan, el cavalier, savio a terra ferma, e sier Alvise di Prioli, la messeno al consejo, e non oteneno, contra la indusia. Et parlono questi: sier Alvise da Molin, sier Alvise Venier, savij dil consejo, sier Alvise di Prioli, sier Andrea Trivixan, el cavalier, savij a terra ferma, sier Zorzi Emo, sier Zuan Trivixan, è ai X savij, sier Luca Zen, procurator, e altri. Et per più intelligentia, da poi se intese che questa parte fo messa per sier Alvise da Molin, savio dil consejo, sier Alvisè di Prioli, sier Andrea Trivixan, cavalier, sier Alvise Mocenigo, cavalier, sier Nicolò Bernardo, savij a terra ferma, di tuor Padoa, atento certa praticha si havia con Bernardin di Parma, contestabele nostro, che ha do fradeli im-

Padoa, i qualli si oferisse dar una porta, et il populo chiama San Marco; et li altri savij voleano, il campo andasse a Citadella. Et fo disputato, et si otene la parte di andar a Padoa di 5 balote, e fo sacramentà el consejo. Ma non resterò di scriver la verità, sier Alvise da Molin, sollo fo el primo metesse la parte etc.

Scurtinio di vice luogo tenente in la Patria 238 di Friul, juxta la parte, con ducati 60 al mexe.

Sier Anzolo Malipiero, è di pregadi, *quondam* sier Thomaso.

Sier Domenego Dolfim, fo provedador in campo, *quondam* sier Dolfim.

† Sier Antonio Zustignan, savio a terra ferma, *quondam* sier Pollo.

Sier Marco Marzello, fo provedador sora i passi in Friul, *quondam* sier Jacomo Antonio, cavalier.

Sier Nicolò Marzello, fo provedador sora i cavallieri, *quondam* sier Nadal.

— Sier Francesco Capello, el cavalier, fo provedador a Trieste, *quondam* sier Cristofolo, soto.

Sier Alvise Zen, fo capitano a Ravenna, *quondam* sier Francesco.

Sier Zuam Vituri, fo soracomito, *quondam* sier Daniel.

Sier Zuam Corner, savio a terra ferma, *quondam* sier Antonio.

Sier Nicolò Corner, fo podestà e capitano a Treviso, *quondam* sier Antonio.

Sier

.

Sier

.

Sier

.

Sier

.

Sier

.

Sier

.

Et noto, in questa matina, in collegio, fono electi, dil numero di X savij sora i debitori, 3, i qualli fosseno sopra li debitori, a farsi pagar etc., e stimar i beni, *videlicet* sier Marin Sanudo, *quondam* sier Francesco, sier Francesco Grimani, *quondam* sier Piero, sier Antonio Morexini, *quondam* sier Francesco; ma 0 fenno.